

欽定全唐文

欽定全唐文卷四百二十五目錄

于邵 三

進畫松竹圖表

爲崔僕射遣高正平論邊事表

論潘炎表

爲崔僕射陳情表

代高尚書陳情表

爲趙侍御陳情表

爲衛尉許卿請留男表

爲人請合祔表

爲崔僕射請弟寬當元載累表

爲劍南西川崔僕射再請入朝表

爲吳王請罪表

代謝賜人糧馬料狀

謝恩賜柑子狀

謝借馬狀

爲薛岌謝賜宅狀

代謝賜永崇宅并賜酒食錦綵器物等狀

謝內園果栽并令府縣供花藥狀

代人作昭應獵謝賜弓箭狀

賀破渭北党項狀

賀斬逆賊僕固瑒狀

賀生擒高玉狀

賀破高玉賊狀

進打獵口味狀

降誕日進馬及織成紅錦地衣狀

奉投降迴鶻大首領大將軍安達干等狀

代

奉誅逆人等狀

代

代郭子儀請孫守亮代男行營事狀

對夷攻蠻假道判

欽定全唐文卷四百二十五

于邵三

進畫松竹圖表

臣某言伏以今月十九日累聖儲休之日陛下降誕之辰  
聲教所加舟車所及固將駿奔大慶鼓舞升平瞻北極而  
效誠匝南山而獻壽臣輒率鄙思畫松竹圖一面并陳贊  
頌願躋聖祚伏貢闕庭臣某中謝伏惟皇帝陛下嗣聖居  
業統天握圖奄宅九圍光承丕構元元敷道須有發明高  
祖造邦義資纂大故得上天垂慶八葉騰輝誕聖神於正

陽統清明於元昊旣徵下武將付中興非徒履迹之祥實  
叶繞樞之異况臣特受榮遇思効微誠撰獻珍奇則珪璋  
有可玷之理馳奉章疏則文字非陳贄之儀故臣常於禮  
歎松柏有心之姿詢於詩仰松柏植茂之興則如佳其不  
朽豈著前聞載微纖微爰有叢竹節雖謝於穎拔操亦迫  
於歲寒故臣輒畫長松佐之脩竹辨其位則松可君於竹  
掄其才則卑可奉於尊然松竹木中特最爲有壽衆材槎  
卉而翠蓋方成暮霰飄零而繁枝益茂輒敢賦形像外移  
色毫端敢借堅貞之姿願增天地之壽况卿雲瑞氣必呈

證聖之祥元鶴仙禽每舉沖天之翼臣所以緣義祝壽出  
幽入微不散氤氲之容同成俯仰之勢徵畫圖之旨誠慙  
創物求比興之義庶近愛君不勝區區之極其松竹圖并  
頌敢冒陳獻無任戰灼之至

爲崔僕射遣高正平論邊事表

臣某言去年五月十日已差知衙事袁遙獻狀露誠上塵  
聖聽猶恐帳下之士未盡對敎邊隅之要不復專達今害  
馬已去時政鼎新期於昇平天下屬望臣叨榮冒寵十有  
二年雖夙興夜寐將補不足智小任大其缺實多臣某誠



惶誠恐頓首頓首伏惟寶應元聖文武皇帝陛下纂戎立  
極俯鑒下人思無不周明必以察故得迷道自返橫波易  
流搜遺逸以在庭叶夢卜而作相頒命布德奉天順人海  
隅蒼生孰不遂性臣僻守三蜀跼蹐一方想通籍而轉疎  
望賡歌而莫及頃者正月之役中路詔還雖迫外懷之虞  
頗貽膚受之愬嘗膽空知其有苦剖心無足以自明未知  
此生朝拜何日臣本道度支判官檢校虞部員外郎高正  
平佐臣理戎積有年歲文學政事不忝前修應緣三軍遠  
支近費無巨無細一與臣同陛下初擇宰臣旁求利害勒

赴闕庭以代臣行近日山西將軍頻執蕃邏詢其動靜確有所傳必擬橫行劍門圖陷全蜀其勢甚大必在防虞正平此行臣意堅切伏乞聖鑒俯垂聽納則內獻心腹外執干戈王室有開萬死無恨心馳魏闕不爲身謀望斷玉關終期生入無任奉國忘家之至謹奉表陳懇以聞

### 論潘炎表

臣某言伏見今月一日制命以劉晏殊死之責連及前禮部侍郎潘炎貶授澧州員外司馬天鑒孔明善惡懸別比諸子壻猶佐上藩凡所見聞莫不欣荷知德刑無頗而行

於代也但臣比見潘炎爲性貞純致身無過介然特立自爲一時之選名不爲晏稱官不由晏進自晏處權掌要未嘗以毫髮受遺未嘗以親戚請求頃自晏居外使闕安禮致書疏知闕寒溫通意都不爲之開緘凡此之類蓋非一

二所以海內修崇名節者莫不歎伏以爲古人之中罕有傳對自晏伏誅眾望炎免況二年風疾手足拘攣氣息奄奄藥餌未復奉詔奔波卽日登路籃輿卧載生死難圖臣愚識炎日久知炎至行伏恐斃一吉士爲代所悲冒責上聞庶幾下達儻蒙聖人迴聽恤以守道不回賜其殘生許

歸田里免隨道殣俯叶羣心將勸清貞之士以勵貪浮之俗炎之幸也臣愚不識忌諱干犯湯鑊塵黷宸嚴陷身無地不勝知賢請命之至謹詣東上閤門奉表陳列以聞

爲崔僕射陳情表

臣某言臣聞行師命將必先保大服戎共武方議膚公所  
以協和軍蒐戡定時難伏惟寶應元聖文武皇帝陛下誕  
膺天命以撫方夏洪惟眷圖用征不惠上敬天授下咨人  
力則殊方異俗罔不率俾蠢茲西戎猶肆逆命勞我薄伐  
示人有征夷不亂華自宜殄滅盈不可久神亦禍淫天之

道也臣近得上都所由報狀伏承受相府元帥之寄領漁陽突騎之眾分邠土鎮守之師內無所疑外無所怨上讓下競禮合義均不爲身謀同獎王室此皆陛下明爲元首德洽蓋臣夷吾必知其小孔明遂均於魚水不然豈同德度力偶俱無猜以此討戎何戎不滅以此論道何道不平臣蒙國寵靈榮加九族功慙白馬位達綠車每承聖敬日躋輒願殺身是効今日之會實契丹誠無任感時惓欸之至謹遣某官奉表陳情以聞

代高尚書陳情表

臣某言臣本凡才智畧無取因緣際會驟列班榮分閫尹  
京實爲塵忝頃者鳳翔之日蕃漢憑陵臣嘗激勵羌渾竟  
剿戎虜方將席卷永息邊虞旋奉德音遽令入奏微誠莫  
展殃疊已鍾痛骨摧心載崩載咽荼毒未幾起復舊官累  
表陳乞不蒙允許及犬戎構禍憑陵京城陛下授臣檢校  
刑部尚書都知元帥中軍兵馬使雖承恩命未有軍行麾  
下之人纔盈數騎空懷赴難莫克死綏仰天椎心伏增憤  
激不踰信宿便屬蒼黃未知鑾駕東巡且欲荆襄陪扈累  
遭剽掠始達藍田更逢子儀留臣計事招集亡散共收上

都比至入城又奏臣住奔波險阻契濶山川進慙將帥之  
臣退羞羈縲之僕顧唯狼狽寢寐兢惶臣某誠惶誠恐稽  
首頓首死罪死罪今又亡母在殯欲祔舊塋先遠戒期正  
當此月干戈之際寇盜爲虞小有不安永負生母願終子  
道以奉亡靈儻封樹有成雖隕越無恨伏望許臣畢事之  
日得令奔走陝郊碎首行間甘心罪責無任兢惕屏營之  
至

爲趙侍御陳情表

臣某言臣以固陋累蒙獎擢猥廁朝列與羣賢並始自給

事驟遷侍郎贊貳冬官典司邦教屬師旅之後庶政從權  
會府舊章多所曠廢惟禮部兵部度支職務尚存頗同往  
昔餘曹空閒案牘全稀一飯而歸竟日無事此臣所以寢  
興長想俯仰增慚何則受恩至深報德無所未裨毫髮虛  
費稻粱伏以人君命官期于述職人臣量力不叨非據寧  
有食君上之祿爲保妻子之謀臣內顧塵忝尤增愧懼頃  
陛下躬決庶務萬方不言而理遠近承式幸當天下一無事  
未敢上陳其愚今承嗣背德阻兵全魏靈曜失道謀亂大  
梁犬戎爲患獯虜伺隙雖禍盈惡稔終冀梟夷而調兵轉



粟在彼疲弊乃羣下憂國之日微臣赴難之秋况諸道牧  
守闕人頗眾是敢不揆薄劣特祈任使如或領一郡或統  
數城綏懷將卒招復逃散近當狂寇俯制奔衝必使人業  
耕桑盜無充斥昔子建之表懇求自試充國之對無踰老  
臣豈徒冒寵干榮實欲酬恩立節臣年甫知命筋力猶強  
策勵驚蹇庶成萬一無任懇悃迫切之至

爲衛尉許卿請留男表

臣某言臣男某官某頃年二十有二因外人招誘性乏天  
和臣又拙訓遂交游非類妄用錢物臣恐滋蔓累及家私

臣某年任寧州刺史表請磧西効力離鄉別親庶其思過  
臣遽遭流竄比屬艱難遐荒萬里分爲阻絕近節度使差  
奏軍事會臣待罪輦轂重與相見至京以來臣竊窺察誘  
其由衷似辨君親近於觀志屢申懇到願留晨昏夫物感  
人情况茲天屬苟及於此惕然關心臣今齒髮衰暮唯生  
此子儻其改行家有所傳九原之下可以塞責臣昨詢問  
磧西職掌殊非要重伏乞聖慈迴鑒許爲父子如初便留  
効節東軍與叔冀逐急征討盡其武用或樹功勲王事不  
殊殘寇又切臣得地近時復知聞縱其不賢猶可備使老

臣之幸至微至賤輕黷宸嚴覲冒之求戰越無地

爲人請合祔表

臣某言臣固不肖寵由父任累荷朝獎非臣本才永惟筮仕之初濫觴有地感舊恩愛竊係于心故開府儀同三司兼太常卿李承光頃充河西兵馬使天寶年中錄臣帳下自茲効用得列戎班出入五涼艱勤一紀風雨寒暑未嘗廢離俄屬幽燕作逆伊洛陷寇蒲潼不關天地交閉承光臨計自失倉卒西還亦旣通表華陽奉牋靈武枕干待命俟期而往曾未信宿先朝賜書敦序兄弟如家人禮當是

時也臣親見之開緘流涕是日便發及至行在特加天下  
兵馬副元帥改名匡國扈蹕彭原別承誥旨因此伏法當  
瘞朔陞身雖受刑家免孥戮遽蒙昭雪發使宣恩特令安  
存葬日官給今長男願見充鎮西副將次子諤又知覃懷  
兵馬女壻周鼎分閭河西咸受綠車之榮並爲白馬之將  
聖朝寵寄洎男及女臣謂匡國雖死猶生近以孀妻告終  
願從合祔諤等銜恤無由上陳將傳銘誄未正官爵且匡  
國非禁人收視之責微臣當故吏願言之時輒冒宸聰乞  
從優贈縱前封尚在詎敢追榮儻後命有加方期復魄則

衛青有時將葬而樂布不負一言黃泉有知丹慊斯在無任懇款求哀之至謹詣某門奉表陳乞以聞

爲崔僕射請弟寬當元載累表

臣寧言伏見詔命以中書侍郎元載黷貨無厭姦邪迹露國有明憲已寘嚴科臣弟御史中丞寬頃緣長春宮事蒙恩充載判官今罪累所加寬亦合從譴責念其愚直懼此禍階每荷聖朝獎拔之私累忝中臺精選之務因逾所効寵貴當時上答之期分知死所臣忝骨肉之分休戚是均夙夜震驚反側難措朝典輕重不爲微臣伏乞聖恩無以

私貸伏增惶懼之至謹遣某官某奉表請罪以聞

爲劍南西川崔僕射再請入朝表

臣某言去冬臣知衙事官姚悟回伏奉手詔許臣入朝臣自西川軍還理裝撰吉與監軍使孟游仙等以今月五日發成都十二日至綿州羅江縣中使馬承倩至又奉恩旨令臣與游仙等却迴臣久辭闕庭從事邊塞思一朝覲如天無階忽遂此行神道所感豈知中路猶阻懇誠揮涕慚對於三軍結戀詎同於他日臣所行意實不謀身一欲辯折讒間兼欲敷陳國要有不可形之翰墨有不可傳之外

人表臣心切唯天而已將士等知臣惓歎共憂家國見臣不行魂氣俱喪臣以迫於所務抱恨南邊固請監軍使行猶期上訴雖一夫阻命而違眾實難游仙今于漢州便發以從諸將之請軍中要務悉以咨之伏乞聖聰俯遂羣議則冀上輯下睦永無外虞西南艱危再沐清晏豈臣獨夫之幸實充萬人之幸無任懇迫屏營之至謹附監軍使孟游仙奉表陳請以聞

爲吳王請罪表

臣祇言臣長男岵受國恩榮出典藩翰不能昭宣聖理協

和上下爰抵憲章自貽剿絕臣年過歲制識謝平人徒以  
宗親昧於名教罪因兇悖之子敢望全生之分臣誠惶誠  
恐頓首頓首臣一自停務因茲杜門瞻闕庭而待命佇荒  
陬以投畀頃者未明去就私喪心魂近以獲奉刑名公聞  
信宿尚迴天鑒免肆市朝因其所流許以自決且身首不  
異豈足謝於方隅而禮律所均尚未論於家屬遂使九泉  
之下猶荷全歸三族之中欣承在宥微臣朽老無階上答  
縱填溝壑雖死猶生無任感恩負德之至謹詣朝堂并領  
男前梓州刺史某等束身請罪輕贖宸嚴兢惶無地



代謝賜人糧馬料狀

右臣先奉恩旨賜前件人糧馬料初已陳讓不蒙允許臣昨日於延英對見又請前件糧數內停一千人糧聖情未察倍增惶懼臣自興兵以來早參戎律及討慶緒卽從先皇皆虔奉睿謀遂清多難豈臣薄劣輒敢貪天而寵遇特深封賞殊厚纏綿渥澤三十餘年食邑累加俸料甚廣自此外更有田園朝夕所須幸無闕乏不謂繼明之始恩出非常曲賜褒崇沾此糧料雖雲雨之施在恩私而至極彼凋朽之質顧饕餮而多慙是以形神震駭不知所據懼

悚顛沛以促餘年敢犯宸嚴重祈哀亮儻蒙全度伏乞賜  
停謹奉狀

謝恩賜柑子狀

右中使某乙至奉宣進止賜臣前件柑子伏以江潭所出  
見重於南州包茅入貢遠歸於北闕陛下念其野次賜及  
微臣顧萍實以虛言非蔗漿之足擬分柑絕少竊荷於恩  
私食堪懷音敢忘於報効

謝借馬狀

右今日中使某至以臣朝奏闕庭特借前件馬拜受殊深

不任驚懼伏以詔傳中貴馬出內閑恩光自降於九重翦飾不關於眾口無功無効以懼以慙遂躡權奇方遺款段瞻天心喜已馳捧日之誠向闕身輕更遇奔星之足仰邱山而轉重知報効以何階

爲薛岌謝賜宅狀

右件宅先賜臣亡弟嵩比緣空閑臣遂權住某年月日中使某至奉宣進止轉以賜臣并敕所司改給公驗臣素空行藝久遭扞脇陛下特存要領更齒班榮宥以非常之恩加以超等之賜自典環列職在警巡歲月徒深涓塵罕錄

豈謂叨承後命曲被殊私賜以廕庇之地永爲子孫之業  
生輕施重內省知慙捐軀報德實臣志願

代謝賜永崇宅并賜酒食錦綵器物等狀

右今日中使某至伏奉恩旨令臣移入所賜宅并賜前件  
者慈旨曲降驚抃難容臣以微生幸逢休運上公政本旣  
荷殊私理第頒田特超恒數且居爽塏又賜歡娛芳膳出  
於天厨嘉賓傾於朝彥金石諧座珍奇爛庭况棟宇輪囷  
近加圻塤林塘祕邃潛蓄清凉素以衡茅特驚宏敞周履  
旣增於魂悸眄睠殊覺於心慙臣實何人邁茲多幸飲恩

知愧受賜輕生誓將灰粉百身償國家之恩遇拂磨一劍  
弭兇醜於邊疆區區寸誠仰答萬一不任戴荷之至

謝內園果栽并令府縣供花藥狀

右臣得男曜狀稱伏奉聖旨緣臣莊栽蒔賜內園果樹又  
令府縣與竹及同栽花藥等今月十日仍令開府魚朝恩  
以下到莊檢校者謬承天眷累沐恩私事有至微亦關聖  
慮顧唯別業封植未成特降明命賜臣甘木移根上苑擢  
秀中園發揮池館之勝實荷生成之力侍臣中貴接武員  
來墟落生光里閭增慶況內園所賜品類已多府縣更供

竊憂煩擾在臣諸已先有不敢重此勞人望停府縣所供曲遂微臣至願

代人作昭應獵謝賜弓箭狀

右中使某至伏蒙賜前件弓箭跪捧殊私抃躍無地伏以彤弓出韞利鏃離弦月滿星流皆承御物摧剛服猛便假天威慙無矯控之能庶盡追擒之狀

賀破渭北党項狀

右臣得所由報破前件賊者伏以作逆者皇穹所誅阻兵者黔首共棄此賊與懷恩作惡俱爲不道昨率其蜂蠆犯

我郊畿奉天之眾振其前邠州之軍制其後彼進無所入  
退知難歸尚肆貪狼更爲封豕毆侵縣邑剽掠居人光進  
仗天之威首殲魁孽杜冤賈士之勇再掃殘妖旣已誅其  
鯨鯢佇見傾其巢穴凡在戎旅孰不歡欣臣忝總兵權倍  
萬恒品

賀斬逆賊僕固瑒狀

右臣某日於華州下邽縣東乾坑店下營伏承中使某昨  
日於路將賊逆僕固瑒首級過上都者伏以前件賊夷狄  
雜種素無令望本因行陣得踐榮班當將帥之權効錐刀

之用幸憑廟算頗立戰功陛下嘉其成效寵以非次謂能盡節翻構異端兇惡貫盈人神共棄今引頸受戮傳首而來率土之人不勝大慶子旣伏罪父必成擒掃蕩妖氛在於旬日臣忝司戎律倍萬恒情遲迴路隅踴躍忘倦無任慶快之至

賀生擒高玉狀

右臣得澤潞節度兼鳳翔秦隴臨洮觀察處置等使李抱玉今月二十日牒稱先鋒將柏秀等十一月於南梁州大雪嶺北破前件賊黨殺戮四千五百人生擒高玉妻及男



女二人并獲牛馬八千頭匹器械三千餘事又得李抱玉  
今月日狀稱於南梁州城固縣界擒高玉訖伏以此賊因  
依山險嘯聚甲兵蟻鬬郊畿之間鴟張邑屋之下西與犬  
戎連接北與逆豎交通更唱迭和窮兇極惡神人所棄覆  
載不容李抱玉虔奉睿謀采入其阻始則俘其逆黨終用  
覆此兇渠巖穴以之風行雪林由其電掃威靈遠暢兆庶  
同歡在臣微誠倍萬恒品

賀破高玉賊狀

右臣得孫志直狀報具件如前伏以此賊嘯聚日久兇逆

實深在於邦畿頗罹辛螫旣與犬戎相結又共懷恩合謀  
若二寇北來必爲內應孫志直忝承廟算討伐殘兇旣斬  
級以擒生遂傾巢而落卵蕃渠失援邊烽可息臣忝總戎  
倍萬恒品

進打獵口味狀

右伏以平野未春寒山餘雪陛下俯令畋獵遙借寵靈豐  
狐難脫於重環狡兔莫遺於三窟觀同將帥藝角偏裨况  
節號嘉平時兼蜡祭承威稟命恩已貸於戎臣登俎充庖  
味宜先於君上雖八珍豐衍六禽填盛輒傾誠於金鼎庶

慕義於野芹前件品味謹隨狀進

降誕日進馬及織成紅錦地衣狀

右臣伏以今月十九日陛下降誕之辰萬國駿奔二儀交泰玉帛方陳於闕下慶抃實匝於寰中臣謬荷殊恩思登壽域伏以馬則雄姿未織句疑誠謝于權奇織成乃異于采箱宜或存于煥爛懿茲致遠之用宜秉舍章之資憑物莫誠感恩祝聖所獻雖慚於萬國均情實邁於等夷臣不勝懇悃之至

奉投降迴鶻大首領大將軍安達干等狀

代

右臣得邠州節度使牒上件人等背逆歸順云被懷恩招  
來打鳴沙縣便擬將收長安爲不奉可汗處分遂却迴邠  
寧投降並到使訖謹遣監軍使徐欽令領赴闕庭者迴鶻  
遠蕃素効臣節自中原倣擾累建勲庸陛下約爲兄弟式  
崇惠好我卽示以恩信親仁善鄰之道彼亦懷於德澤爲  
不侵叛之臣而逆豎猖狂間行招誘初遭誑惑雖衿甲而  
卽戎遽感恩私竟束身而請命可汗旣不助逆懷恩當卽  
成擒殘孽永清指期非遠

奉誅逆人等狀

代

右前件官等或久登清貫或厚受國恩天步艱難不隨清蹕僞庭頡頏忍飲盜泉或修撰文書或統制兵馬或動眾以資敵或作姦以蠹人事迹昭彰實不可掩臣等初命禁錮伏候聖恩輿議囂然皆將傳刃此等大逆無道覆載難容臣叅諸禮法案軍令訖匿瑕舍垢誠君父之恩私嫉惡剛腸亦臣下之職分擅此處置伏增戰越

代郭子儀請孫守亮代男行營事狀

右臣前日面奉進旨前件男領兵馬赴靈州伏以朔方軍幕宿將頗多任以兵權合先勲舊非獨藉其時望亦以厭

伏衆心男晞年纔成立素不更事雖薄閑騎射而未有智謀軍政弛張或非詳練昨緣逆徒在近畿甸多虞令統先軍以當大敵倉皇之際不可固避畢力捐軀幸摧堅陣此天威所及非童子有成欲速赴邊陲實恐未堪專任右廂兵馬使開府孫守亮出身入仕皆在軍行將校畏威士卒懷惠智能料敵勇可摧兇使與渾日進同行必冀免貽聖慮又男晞自幼及長首末隨臣常在私庭未曾遠行深願容其濯澣許以旬月休閑他日更有任使敢不奔波道路臣位崇寄重効淺恩深常恐委任失人以速官謗知子者

父敢不上陳伏乞天慈俯哀誠請

對夷攻蠻假道判

夷攻蠻道由邊邑麥已熟或請人皆出獲宰不  
許郡長讓之云恐爲不耕者所得

舉政之要先禁乎惠奸因人之欲必從於義取固防閑之  
是以雖顛沛而無懷蠢彼邊邑實由徼路屬門繫闕九於字

下幾出戰於行間瞻彼麥田是登乎秋野惟人之恤且發  
乎縣門多稼其豐誰資於出獲或人爲請雖楚得其所之  
宰也有詞寧齊至而作害庶有恥于吾化將不耕爲爾虞

此日方殷人期利寇他年有事誰不幸災異鄭師以取溫  
周人既怨同單父之規魯子賤猶生爲郡伊何徒聞有讓  
理邑餘裕云胡不知此而厚誣曷旌善績以贊不欺之政  
因明致詰之非



欽定全唐文卷四百二十六目錄

新文藝出版社藏書

于邵 四

與蕭相公書

與常相公書

與元相公書

爲崔僕射與郭令公書

爲崔僕射與朱泚書

與裴諫議虬書

與郭令公書

金定全集卷之四  
與楊員外書

與李尚書書

與常侍御書

與侯二山人書

九日陪廉使盧端公宴東樓序

晚秋陪盧侍御遊石橋序

陪諸公宴京兆王參軍宅序

春宴蕭侍郎林亭序

遊李校書花藥園序

欽定金唐文卷四百二十六

于邵

四

與蕭相公書

相公閣下某以抱疊遐荒殘魂未絕偷度時刻倏忽四年  
伏以宗社未安兇逆猶在才無取入死難莫由天地之中  
甘爲棄物豈意當此之日逢相公安撫之時狂夫之言猶  
有一得芻蕘見納庸可庶乎伏惟相公秉鈞戡難道冠伊  
呂方期除天地之害更造生靈之本故詔書曰則如親臨  
又曰其代予言大哉倚賴斯可畏也安得因循故轍返顧

於身乎奉惟相公之憂深入骨髓矣聖上纘序鴻業於今  
六年將求昇平初若不及以無賢相左右虧我聖道近二  
三年有執事者蔽主之耳目括囊括身內懷姦忌外擅威  
柄衣冠爲之側足道路不敢偶語眾叛人離遂有今日相  
公所自見知旣不能誅宏羊以謝天下則今之所急者皆  
在相公穀中耳况居儲后之姻重受台廷之寄國弊身弊  
國安身安旣須以形跡遠嫌又須以直道見節爲相公之  
福深以爲難是卽疏家知止馬氏不侯至今高人借以爲  
誡斯爲上矣如或急於救世雖不獲已道德刑政仁義干

戈任權重輕惟精惟一斯爲次矣此外滔滔者皆是非愚  
所知今大盜未除羣寇更起其可處置者惟兩江平淮三  
蜀五嶺而已其中最切者請舉尤以明之每道皆有客軍  
本在同心平難側聞將校謀勝監軍爭長節度歛手金多  
者雖敗卽安無金者纔入則退戰勝攻取未之前聞爲今  
之計莫若監軍一切且停客軍權屬節使申明本管無得  
相干然後慎選良將文武兼備委之鎮撫希在萬一餘則  
厯在相公目前不敢煩於簡翰負累憂危年垂七十沉痾  
積疹四十餘年自到炎方幸未及死豈合以國家大務言

達相府乎實以故韋吏部有忘年之分嘗約以相公今日之望每恨生死契濶不盡曩時之期拳拳之心皎如白日良友雖歿情豈忘乎伏蒙每賜書問亦承念及微命恃此不恐輒冒威嚴其是與非不在小子又自悲者平生志業身退毀隨紛紛世情鮮不乘便浮石沉水自古而然熒熒萬里誰能識察敢託相公門闌之舊輒書當時得罪之由再煩視聽具如別狀因宋侍御上垂詳覽又嘗內省自卜者審旣已衰暮又昧時用前年病熱遠視不審去夏罹瘴近聽不聞疲憊之餘難於尸素伏乞曲賜恩波放歸田里

傳家就木不天天年九原之下期以贖責甚大惠也如以  
歸田聞奏無端卽乞以檢校開官爲請許令隨便養病免  
死殊俗又大惠也伏念斗筲之器須當承乏之用任過其  
量自合速辜然於其中有可恕者且獲戾之始實謗爲深  
不蒙鞫問至今爲累若不然者豈三人同罪而一身受罰  
蔣鎮列曹會府袁高選牧名藩由此而言痕累未盡每一  
念至驚危貫心豈無知人誰爲言者今之所祈恕者屬鴻  
恩宥過掩瑕滌穢亡官失爵猶蒙收敘况身佐州端秩猶  
五品乞從反褐以贖前愆免入量移再罹降黜餘生願畢

瞑目如歸幸甚又事有失於知退而終可言者竊以聖上  
建元立極之初每賜驅策雖無塵露之効頗傳潤色之美  
有冊皇太后尊號聖神文武尊號皇儲宜建之制皆泥金  
檢玉著之國史其餘則北蕃西戎詔冊文誥無大無小何  
密何疎侯王將相出入中外數年之間事無虛日皆承特  
旨俾以發揮聲猷所浹必由是也豈惟叨竊之幸實爲不  
朽之幸矣昔隋文帝謂楊素牛宏曰薛道衡老矣宜使朱  
門列戟薛公謝恩且辭無功隋文帝詔曰自吾有寶位國  
家大事皆爾宣行豈非大功耶薛公乃受賜愚雖才不逮



薛而焯敘盛明過於薛遠矣願以簪履之念得遂邱園之  
請追前獎拔雖死猶生伏願相公深納焉沉迷鄙敗不知  
忌諱馳魂惕慮退不自安死罪死罪

與常相公書

相公閣下自蒼生允望帝載緝熙大小仲父四方風動既  
絕橫議且無多門幸甚幸甚卽復何幸又當此時之則然  
命乃未偶通塞之分併在去年則相公首薦之恩鄙夫膺  
受之美徒拭人目孰知其心是以區區子牟不敢忘闕而  
又自惜昔常陪相公鄉里之舉時應神州甲乙之選其餘

馳逸足揮勁翮修容裁裁來以干進者蓋千百數在公堂  
預鹿鳴之宴猶不可得況會府鶯遷之地者乎相公當時  
裒然居天下第一愚實不佞忝從斯列六子登科又廁其  
數凡我連茹世論以榮皆因依相公用白粉黛是乃降神  
惟嶽有開必先右掖司言中均典翰出入承盼從容十年  
啟沃之由自此而始則知輔弼之道在天非人嗚呼同時  
之人零落向盡彭楊李賀冥冥何之今相公宰平天下而  
鄙夫拘束邊外獨不得一親顏色更露腹心則漢庭于相  
公何厚哉是以內省可知命焉是以垂頭塌翼不敢思奮

况家事未畢立雖無地男可從官女可許筭耳順之年馳  
復始滿名位日退沉痾歲深君臣之道天人之際心雖如  
丹誰表赤實此皆鄙夫與相公今日之事也豈無他人在  
我同志而已况相公無失其親無失其故二江之上獨立  
無親一麾以還未之有故舉目生憤傷如之何未知相公  
何以畱念悲趙武之視蔭感伍員之逆施拳拳之心欲罷  
不忍伏願體道垂統加餐保和乘風雲之感會行宰相之  
能事無寶斯位無愛斯權無念同升於朝無念若撻於市  
咸有一德不其盛歟方將伊臯比崇管樂論霸寧展禽三

黜無怨在胡廣七登何補鄙老也有知美善不識忌諱遠  
塵視聽忠告尺書然非盡言之具庶咨道意之本所不爾  
者謂之何哉前漢州司田樊登兄弟舊遊三十載矣相公  
席硯昔與之同言念撫塵今也祇召甚大惠也因是利往  
得無謝焉邵頓首

與元相公書

某月日通直郎殿中侍御史內供奉于邵頓首相公閣下  
一昨外甥右威衛錄事參軍宇文寶至奉傳慰誨不忘疵  
賤仍及家私造化之地禮物云隔一言一盼盡爲曲貸旣

出望外不知所酌懷仁荷德載兢載懼伏惟相公膺斯夾  
輔閔心保乂尹正天下易哉爲君虞友五臣黃師六相匡  
救之分心豈異乎自經艱難常處僻陋外乏長策內罹百  
殃悲生於累心亦盡矣頃者羈齒隴上迫諸寇戎分爲係  
虜永絕殊俗豈意朝廷勤爲官之選相公垂推已之美席  
硯存愛風塵念舊不以蒙鄙才無可觀曾微浹年再忝持  
憲振拔泥滯復爲人知恩深提攜物無所棄進慙其往之  
誠退累則哲之明彷徨失圖罔知攸効又自悲者天倫之  
變禍橫相次家途淪胥素業無託他鄉異縣至於流離力

未集事死又無補泣血仰天復何可言所以乘流則逝尸  
祿苟活國步未泰斯何底寧願言掃門不可遂得伏惟相  
公濟代推功渴日行道方將草創天下經綸時變大啟區  
寓再垂衣裳願神滌慮正在今日無以外物虧損遂爲咎  
也御衡持政前計不迷想廟堂之當安全蒼生之始望小  
人之幸日月以冀然後但見鴻鵠拂摩青冥不知其極也  
謹附監察御史蘇端啟事以干罪貽煩黷伏增惶汗

爲崔僕射與郭令公書

某月日某官某謹奏記令公閣下幽風固陰月紀將暮伏

惟尊安福履萬壽無疆幸甚幸甚某遠鎮方隅蕃蠻未靖  
力微寄重憂慮交煎雖無暇自謀終分心遠難一昨中使  
飛駟王命急宣特論西戎侵徧郊甸卽日奔走以副廟謀  
神往形留豈遑夙夜近知輦下人無動搖復聞朝廷勞師  
薄伐朱相公以幽燕勁騎先啟戎行而令公以朔漢舊軍  
暫分兵要始則聖畧不世出而推心與人終則上台應時  
須而同力戡難朱公稟命而有進令公遣戍而不疑是皆  
存大業於至公遂表無私以奉已太白所以食昴魯陽所  
以迴暉斯乃協和萬邦豈必因依一代昔者范宣子讓德

晉君以霸藺將軍避怒秦兵不侵書之縑緡名亦不朽令  
公勲冠天地力存宗社每當一軍隱如敵國若涉大川而  
令公能濟若火燎原而令公能減厚德及行葦太和合陽  
春謙尊而光直方以載四方延頸萬邦立程當今執事在  
具瞻之上將自下而彌高欲從損而彌益一諾而千萬人  
說一謙而千萬人讓況作相三朝行師二紀東征西怨遠  
懷邇安是以蒼海之隅莫不率俾膏雨旣滋於百穀人倫  
復正於五常當今日之嘉猷何邃古之能擬齊晉之際其  
大此乎某區區不才謬司戎律每欲剗心示眾嘗膽酬恩



側聽遠方有行君父忘寢與食思奉前人刳辱在下風特  
榮恩獎欣逢千載之事竊賀兩君之好感慕書紳未知其  
極謹遣某官某奉獻情言書非盡言之具蓋陳赤實拳拳  
之分某頓首再拜

爲崔僕射與朱泚書

某月日某官某乙謹奏記相公閣下羌戎之患蓋三代矣  
秦漢以還怨詐更作詳諸舊史抑有前聞今則乘我閒釁  
於茲二紀亂華謀夏腥聞於天貪恠無厭暴殄斯極侵軼  
我湯沐震驚我兆人十月之初中官驛至密奉宸翰遠使

臨邊拜受遂行赴敵宜速西山之役尋已加兵將赴急宣  
不遑啟處所以晝分忘食夕惕懷冰關山阻隔使信頓絕  
北望雲關南馳夢魂近者日有京信方表朝廷清晏雖寇  
猶外姦而人無內警然則回中未靜廊役仍勤相公維岳  
降靈求巖作輔不學古法知幾其神是以聖聰寄揚我武  
旣奉鑿門之禮具稟至天之誠折首摧鋒計日告捷詩云  
赫赫南仲獫狁于襄不其盛乎伏以令公勲庸冠世焯見  
於天受三朝將相之託有萬人父母之愛方謝安之體大  
知鄧禹之道宏相公特稟廟謨龔行天討分邠寧拔距之

眾兼漁陽賈勇之軍偶俱無猜上讓下競用獎王室作爲  
人綱一舉而大義全暫勞而殊功倍以此眾戰何戰不克  
以此滅戎何戎不盡某遠承惠顧委分知歸感遇因時若  
此之甚延首北嚮一心如丹謹遣某官某乙奉記陳情不  
宣某乙頓首再拜

與裴諫議虬書

閣下昨日愚子臯謨起居迴蒙以放鷹度隴二賦及宗儒  
銘自發東甌至安南諸作見示隋掌明珠忽蒙分惠秦臺  
重璧不聞旁臨是何衰暮偶此殊觀幸甚幸甚自微言中

絕大義復乖厯戰國縱橫之後遭亡秦煨燼之末四始不作斯文無紀漢興總輯馳騖稍復詩騷之體訖建安之間皆可垂訓風流更代紛然殽雜迨有高下不可勝論齊梁陳隋乃至流遁矣國家受命煥乎文明開元天寶於斯爲盛格高體正者君臣之義天人之際畢備於斯矣先覺後進其誰閒焉屬三十年來兵戈不息所務者急所貴者異過之則進不過則墜考之文章東不流於海南不集於江萬方行紀安可得哉某性乏天假學非專門徒以菲薄少有謬膺清切特用潤色鴻業頗承渥私孤奉明恩競速官

謫居之地猶佐大藩承府公蔭庥忝下榻清譙風亭月  
觀美景良辰未嘗不接高興陪嘯咏雖唱高和寡未能宏  
道雲從風感時賴起予如此之眷者如此之樂者歲不我  
與星迴四周而不知老之將至累之在已餘生之幸斯亦  
厚矣閣下心無所負神保其真冒南氣之炎鑠泛重溟之  
湍悍清光可鑑素履惟精雲天意長復此與合有足歡也  
今網罹俊乂渴日爲勞明詔屢下旁求四達未有天生棟  
梁而不構大廈時遭霸王而不先受器者也在姑務修德  
而已前宵之命情實未盡燭不見跋露不稱晞區區主人

有所慙遜信宿而未獲拜賜者實以沉痾之故旦暮爲劇  
况南面蒼梧北背瀟湘歲聿云暮於焉遷客心折骨驚復  
何言哉所得四卷繕寫已畢致之篋笥爲藏馳遣臯謨送  
本不復一一

與郭令公書

汾陽王令公閣下伏惟戡亂定禍勲載王府致君行已德  
冠當時講信修睦敦敘舊好悉爲古今第一則小子在數  
科之一而不能上達以自布露九泉之下何以塞責頃年  
令公先府君刺史于渭家世出牧於岷二境相接數年修

好睦爲弟兄契以金石則令公之所聞見也久矣初以專  
經遜業常假籍於渭之渚於時使君又特以禮送問以時  
務許以大名爲之下榻教之改業復歸以報命先人從而  
誨焉天寶中忝以進士及第其年判入超絕科受校書此  
則使君負人倫高鑒施及小子不其神乎永懷報德何日  
敢忘慶流後嗣日以昌大及茲匡救莫之與京謬從庶官  
之列黜於衆人之下爰自起居郎署省闈未爲令公所顧  
以職在下位不敢干進也殊不知江海納細以爲大山岳  
積壤以爲高斯道日顯人皆是倣以不待掃門願陪下拜

有若公之令弟少府監知之爲人工部趙侍郎賞之爲文  
戶部李郎中列之爲友皆朝廷俊選而不相鄙棄庸可誣  
乎夫有開必先兆所感如小子者使先文字之已足於  
此令弟愛之貴壻終眷之及於此而不能再登龍門禮敘  
世舊未之有也謹奉尺書塵黷執事轉於內屏以待命死  
罪死罪某再拜

與楊員外書

七官院長足下愴與子別難以爲晤出處默語蓋非一途  
頃自除官乘流則逝性有定分愚不可移是進已無所干



退亦無所悶到家喜骨肉之愛出門全賓友之歡陶然而不知老之將至亦何暇役耳目從智力哉故知山林之士入而不返者宜每逍遙縱觀從亨多暇近覽古公避狄之地緬想周文出畋之師如其仁如其仁又其聖也不遠間井頽然舊風嗟乎我生不辰遭值世難天未悔禍人猶怨嗟顧子弟之爲邑迫時政以多故恭寬信敏惠力行不必果長太息之復何可言猗那楊生行道利物勤於四海君子之踐中朝炳然從容畫計抑有由也勉旃良圖無以自媚風味遐屬此情難論嘗當春臺梅柳動色思與攜手傷

如之何時流好音尚慰羈旅幸甚幸甚太尉告身在匠人  
魚朝處望爲收取遠代傳慶不欲失墜慎爾無忽因家人  
馳驛臨紙惘然于邵頓首

與李尚書書

某頓首尚書姨夫閣下伏惟秀出天枝挺生王國十年分  
闡八座居榮善譽嘉聲聞於四海幸甚幸甚某忝接末姻  
早承餘賸南秦旅寄特奉周旋西掖宦遊叨聯清切高山  
景行何日忘之去年出守江華未遑進路猥當時議且復  
拘留滿室遺孤立雖無地朝求暮乞日往月來外愧親朋

內慙骨肉屏居陋巷不堪其憂唯此絕糧已復旬日古人  
併食今實當之側聞姨夫入朝先以貧賤爲意頌聲載路  
誰不歸心某於池陽之間獲空閑數頃之地誓將作勞隴  
畝以望秋登所乏耕牛傭賃無計儻或哀此窘迫許以後  
圖解倒懸之憂廣調急之路以德報怨先哲格言區區之  
心竊慕此耳輒肆干觸昧于是非懲諸常情豈敢逃責痼  
疾暴發末由造門謹使家人投刺不宣某再拜

與常侍御書

近承書問兼示新書清心滌靈迴視易聽靜以究微婉有

義可激悅以觀殊姿外容奚施徒見風雲相馳金玉交映  
曾不旋踵澤人之思一至於此甚大惠也直翰林之所可  
法豈不才而獨寶耶尋呈康子初云未見繕寫將送適遇  
有來遍示幕中無不嘉歎緣家累詣府求醫重陽之前當  
復北縣旬日之後便赴上都良覲無因此惟歎敘珍重珍  
重人使不斷絕也轉憑司錄馳白不一于邵頓首

與侯二山人書

侯二山人足下所示三論鉤深索隱俾夜作晝殆浹辰矣  
如登太山徒仰其高若涉大水不測其深旨哉斯言蓋不

可得而儔矣以此究天人何道不宏以此圖戰伐何敵不  
剋以此養精神何壽不長可謂通幽洞微垂代作教寧止  
士林爭做求道趨風乎予復何才敢承末學已令繕寫藏  
諸袖中刳心寶持不敢失墜幸甚恐須舊本謹勒專送猶  
賴發蒙何當訪及間宵對酒斯以爲榮不復一一于邵頓  
首

九日陪廉使盧端公宴東樓序

國家以桂林重鎮吳越襟帶有郡縣可以綱紀有蠻夷可  
以羈縻朔南聲教蓋以此始皇上纘承大位之明年啟謨

羣后載命連率是以范陽盧公自京而來條察二十八州  
諸軍事千里之地遂無外虞三軍之士皆務前敵然後賞  
必勞罰必害官不易法府無留事封略旣靜公堂自閒况  
重陽美景得不爲樂大合賓佐高張郡樓紅塵發地青山  
垌牧連天漲海來接蒼梧憑高而翠靄轉微送遠而白鴈  
看沒泛椒菊而算爵顧絲桐而閒奏賓醉月上主待露晞  
想彭澤之獨游悵馬臺之陳迹今日之會何其盛歟余負  
累謫居卒起庭府黜叅佐之禮陪上罇之娛韓灰已燃鄒  
谷自煖奉命爲序冠於羣篇辭之所難敢謝不敏請分賦

五韻書諸卽事云

晚秋陪盧侍御遊石橋序

以公責左遷於茲迨一周星矣首疾心痠繼日經懷實由  
南冠尚簪憂所未忘是以幽求人境之外將蕩滌煩慮得  
諸石橋久之豈無他人不如我志願言卒獲者亦久之殿  
中侍御史范陽盧子至監理下國未浹辰而居簡乘暇行  
鑣載勒致爲客數公方駕儉從如林煌煌焉奔走乎墟落  
延屬乎禪宮矣三登彌高累息以進而後偕集於橋下徒  
觀夫掛長虹以飛來陵半霄而勢去下空如豁纖蘿不生

上頂爲帷佳木藂秀不可得而總載也以爲本於融結庸  
可自然資於造化力役不及明矣東極大水北走長安羅  
郭雄堞如示諸掌大田多稼宜乎有秋羣山積翠以回合  
好鳥追飛而下上有是勝賞以是開懷盡賦新詩以紀一  
時之事也侍御以嘗忝鷄沼潤色鴻業以文司錄俾序良  
游敢復畢辭多慚老敗

陪諸公宴京兆王參軍宅序

參軍國族之貴介子也況抗衡神都抵掌翰苑渴日行道  
推心與人故士君子願游芝蘭不避風雨僕校文者得無



勸乎冬至十日雪飛千里攜我入室接君初筵嘉穀惟錯  
清醑有英取適可以齊鷗圖及酣可以去狐白始爲合獻  
之禮終爲縱飲之樂有足多也飛鵲戾天宿鳥擇木鐘鼓  
告暝軒裳欲歸主人諸僕一歲三捷斯文可睹愚以更請  
賓將不然蓋言之不可以亡也多愧皆讓

春宴蕭侍郎林亭序

監察御史蕭公以初獻戎捷塞庭無事從板輿之暇日邀  
幕賓而揖我必選名勝况臨清江始乘安流終踐樊園嘉  
客以入華亭豁開桴浮往來上下皆見竹樹引外郊雲物

鳬鷺爲夫子家禽豈日駐花間天鋪潭底自爲勝繁而蕭  
公於是咨密戚荷賓榮惜此交歡愛此遲景飛觴舉白亦  
云醉止顧我以客時無閒焉拜升堂之嘉慶飽慶壽之餘  
歷殿中侍御史鄭公文宗也退而喜曰今日之會允爲良  
辰不有斯文無以終樂遂歷賦諸韻凡二十餘篇命爲序  
引讓之不可

遊李校書花藥園序

春吹萬以爲物皆有役我智者惟役之不殆終而有用故  
君子盡心於藥焉恐精華之不迨已也崇文館校書郎李

公寢門之外大亭南敞大亭之左勝地東豁環岸種藥不  
知斯地幾十步但觀其縹緲霞錯葱龍烟布密葉層映虛  
根不搖珠點夕露金燃曉光而後花發五色色帶深淺藂  
生一香香有近遠色若錦繡酷如芝蘭動皆襲人靜則奪  
目此李公及時之適也至若上苗可食下體兼採子入菰  
飯華雜蒲俎旣甘平而性寒又辛溫而執熱癖除而不爲  
去傳風愈而安知及書此李公谷中之木也吾徒沐公馨  
香愛我藥石皆可右坐願爲佳遊風生白蘋日映丹浦披  
搖霍靡則花飛鏡中虛涵崢嶸而山在海底入門而未辨

金谷問地而不言河陽况春醞已清家園可摘飲盡落景  
歡無後時憶戴而乘興自來知鐘而聽絃立應此李公推  
心之分也禮曰發慮以憲語云從吾所好慮以觀進好無  
思邪而公智周末兆根據有益上符性命之理下從耳目  
之玩舉一物而庶美集得不謂之難哉韓康隱名徒進識  
者羊叔相遺吾無間然聊對諸人之意用觀賦物之作予  
乃僚也敢無述乎